

# Cor Di Pantera

Principià vogliu  
Di u m'amore la guerra  
Cun tantu orgogliu  
Mi t'ai lasciatu o cara  
Or di tuttu què mi spogliu  
Ben'ch'ella mi sia amara  
Un mi pare d'esse degnu  
Mancu più di vive in terra.

M'avie prumessu  
Di tè m'era ingagiatu  
Davanti à diu  
Ghjuramentu prestatu  
Prufittatu ai di mene  
Quandu eru a lu suldatu  
M'avia fundatu un palazzu  
E l'aghju trovu spiantatu.

Tuttu spiantatu  
E senza fondamenti  
L'altri attendenti  
S'eranu messi nentru  
Eu ne girava à l'intornu  
Cun orgogliu è gran'turmentu  
Si stata cum'è Bazaine  
Quand'ellu ordi tradimentu.

Cor'di pantera  
Fiera più ch'è una tigra  
Tu m'ai traditu  
A mio sincera amica  
E ch'eo ti veca vucane  
Scalza spugliata è famita  
Eppo ghjunghje à la mio porta  
Cù l'abitu d'arimita.

Ti do ghjastemme  
Diu ti dia scugnuri  
E ch'eo ti veca  
Per aria cum'è i nuli  
Ch'è tù ùn trovi frutti in locu  
Ne macerbi ne maturi  
Avetti da succore eu  
Videresti l'omi crudi.

Cor'di pantera  
Tu ne serai in eternu  
Ch'a lu mio core  
Ficcatu ci ai un pernu  
Eu sò cum'è banditi  
Chi stanu fora l'inguernu  
Sò cum'è li gren'suffrenti  
Chi vanu à brusgià in infernu.

Qui chjodu u fogliu  
Cun tristessa infinita  
Tutta sperenza  
Lu mio core hè sparita  
Quella chi n'hè la cagione  
Di nunda sia esaudita  
Sianu lacrime è sangue  
U restu di la to vita.